

Comité da sustegn per il Plantahof

Exponents da tut las partidas represchentadas en il cussegl grond furman il co-presidi

DA MARTIN CABALZAR / FMR

■ **Ier han exponents da las partidas pbd, pcd, pld, ps, pps e verd-liberals preschentà al Plantahof a Landquart lur arguments per la reconstrucziun e renovaziun dal Center da dietas al Plantahof.** Al co-presidi che recumonda al suveran da sustegnair il credit impegnativ da 24,5 milliuns a favur da la renovaziun dal Plantahof appartegnan ils deputads *Gian Peter Niggli* (pld), *Gian Michael* (pbd), *Tina Gartmann-Albin* (ps), *Sepp Föhn* (pcd) ed il parsura dals purs grischuns *Thomas Roffler* (pps). En il cussegl grond era il project vegnì acceptà cun 109 cunter 0 vuschs, il credit è sut-tamess al referendum obligatori, uschia ch'il pievel ha ils 9 da favrer l'ultim pled en chapitel.

Optimar funcziunalitad ed utilisaziun
Sco quai che Gian Peter Niggli (San Muzezzan) accentuescha pon ils edifizis cumpensatorics, construids tenor il standard da minergia R-P-Eco vegnir eliminads e vegnir messas a disposiziun localitads utilisablas en moda flexibla. En il medem mument vegnian las pretensius legalas ademplidas cumplainamain. Per cuntanscher ina soluziun optimala ha il chantun realisà ina concurrenza da projects cun l'intenziun d'elavurar in project che persvada tant pertutgant architettura, funcziunalitad, qualitat estetica e rentabilitad economica. L'incarica da planisaziun ha cumpiglià in nov internat, ina nova cuschina cun sala da mangiar sco era las localitads da producziun ed ils lavuratori e magasins annexs. Il project «Flora» ch'è la finala vegnì tschernì adempleschia il meglier quests criteris, s'adateschia bain al conturn e portia ina tscherta orientaziun e calma en l'entir areal, ha punctuà Niggli. La sala che po vegnir utilisada a moda flexibla è dimensunada per 300 persunas, l'internat porchas plaz per 124 persunas en stanzas du-



Conferenza da medias: Peter Küchler, Gian Peter Niggli, Gian Michael, Tina Gartmann, Thomas Roffler e Sepp Föhn (da san.). FOTO PH. BAER

Rinforzar la posiziun sco center da cumpetenza agricul dominant

Per Gian Michael (Donat) ha il Center da cumpetenza agricol a Landquart ina posiziun predominanta sco center da furmaziun e cussegliaziun en Svizra. «Il Plantahof è la patria emoziunala per ils umans dal territori rural», punctuescha il pur da Schons ch'ha sez absolvi la scola agricola al Plantahof. La finamira dal Plantahof saja da porscher ina vasta furmaziun da basa sco er ina perfecziun professiunala cun il focus sin l'agricultura da muntogna ed il svilup en il spazi rural. Ulteriuras finamiras sajan dentant era da sustegnair las famiglias purilas, da procurar per ina rentabilitad undraivla e da resguardar ils signals dal martgà e da la societad.

Investiziun persistenta per las generaziuns vegnintas

Per il parsura da l'Uniun purila grischuna Thomas Roffler (Crusch) ha il Plantahof ina grond'impurtanza per l'agricultura grischuna. Dapi generaziuns accumpogna il Plantahof ils manaschis purils cun scolaziun, perfecziun, pled e cussegl. Per il Plantahof saja ina gronda sfida da garantir ina scolaziun e perfecziun prospectiva che tegnia quint da la gronda diversitad da l'agricultura en noss chantun. Per ina scola actuala ed orientada vers l'avegnir saja indispensabel da pudair disponer d'infrastructura correspudenta. Da la savida intermediada al Plantahof possian la finala tut las regiuns e valladas da noss chantun profitar, punctuescha il parsura dals purs grischuns.

Tut las valladas profitan da la qualitat dal Plantaof

En la medema crena dat era Tina Gartmann-Albin (Cuira). In attest persvadent per in'agricultura da muntogna moderna saja la gronda cumpart da manaschis biologics en noss chantun. Cun projects innovativs e purschidas attractivas possia l'agricultura grischuna era pledentar e carmalar adina dapli giasts en noss chantun. Products dal bain puril sco er specialitads regiunalas hajan gronda calamita ed ils purs grischuns promovian tant la biodiversitad sco la tgira da l'ambient.

Sepp Föhn (Landquart) accentuescha la necessitad ed urgenza dal project innovativ ch'adempleschia las esigenzas dal temp, resguarda la strategia d'energia ed haja in'irradiaziun naziunala.